

رواية

أعطني قلبك...

أعطيك جسدي

إبراهيم طه شوكت

## مؤسسة يسطرون للطباعة والنشر والتوزيع



**رئيس مجلس الإدارة**

**عماد سالم**

**المدير العام**

**أحمد فؤاد الهادي**

**مدير الإنتاج**

**أحمد عبد الحليم**

الطبعة الأولى

الكتاب : أعطني قلبك ... أعطيك جسدي

المؤلف : إبراهيم طه شوكت

تصنيف الكتاب : رواية

تصميم وإخراج : أحمد عبد الحليم

المقاس ٢٠ × ١٤

رقم الإيداع : ٢٠١٧ / ١٥٦٥٤

الترقيم الدولي : 7 - 466 - 776 - 977 - 978

العنوان : المكتبة والمطبعة : ٣ ش صفوت - محطة المطبعة شارع الملك فيصل - الجيزة

التليفون : ٠١٢٢٩٣٠٠٠٢٩ - ٠١١٥٧٧٦٠٠٥٢

Email : yastoron@gmail.com

موقعنا على الفيس بوك : مؤسسة يسطرون لطباعة وتوزيع الكتب

جميع الحقوق محفوظة للمؤلف

## إهداء

إلى حفیدی عبد الرحمن

غبت عنی جسداً

ولکنک أمانی روحاً

قد لا تراک عینی

ولکن یراک قلبی

جداً

شوکت



## الفصل الأول

اجتمعت الأسرة أمام شاشة التلفزيون، يشاهدون أحد الأفلام، كانت الأسرة مكونة من الأب والأم وولدين وفتاة واحدة .  
فجأة قامت الفتاة قائلة :

— إيه القرف ده ؟

قالت الأم :

— ليه يا فكرية ؟

— الزوج بيقول لزوجته بحبك وبيخونها، والزوجة بتقول له بحبك وهي بتخونه.. هل ده كلام ؟

— إيه الجديد في كده ؟

— دا إسفاف ودعوة للانحلال .

— لكنه موجود في الحياة .  
— مش متصورة إن واحدة عايشة مع واحد في بيت  
واحد، وبتاكل من عرقه وشقاه وتخونه  
.. إزاي ؟

— يا بنتي الحياة فيها كل المتناقضات .  
— يا ماما دا شيء فظيع .. الخيانة شيء فظيع .. الإنسان  
الخاين سواء كان راجل أو ست مفروض يتعاقب زي  
الشرع ما قال وشرع .

— بس الأمور دي موجودة في الحياة فعلاً .  
— ممكن تكون موجودة لكنها مش كتيرة ومش شائعة

قال الأب :

— أنا موافقك يا بنتي ومعاكي تماماً، وبصراحة  
التليفزيون بيعرض حاجات مقرفة، وزي ما يكون  
مفيش رقابة على اللي بيتعرض، ومش عارفين إن  
الشباب بيتأثر بالكلام الفارغ اللي بيعرضه .

— ده اللي أنا باستغرب له، إزاي التليفزيون يعرض  
حاجة زي كده وعارف إن الشباب سريع التأثر .

قالت الأم :

— المهم في الإنسان التربوية .

قال الأب :

— وإيه يعني، إحنا نربي من هنا، والتليفزيون يفسد من هنا، زي ما يكون فيه مخطط لإفساد الشباب .

قالت فكرية :

— يبقى صراع دائم ومش هينتهي.. وليه التليفزيون ما ينقيش اللي بيعرضه ؟

قالت الأم :

— الأفلام تعبير عن الواقع .

قالت فكرية :

— بس ده تشجيع وتجميل للخطأ، مثلاً الخيانة موجودة في الحياة فهل نشجعها ؟

السرقة موجودة في الحياة هل نشجعها ؟

— يا بنتي الحياة مش مثالية زي ما انتي متصورة وفيها الصواب والخطأ، والواجب علينا ناخذ الصواب ونسيب الخطأ .

- ناخذ الصواب ونعمل بيه ، أما الخطأ مش نسييه  
إنما نحاربه مش ننشره في الأفلام والناس تتفرج  
عليه والشباب يتأثر بيه .
- كلامك تمام يا بنتي .
- الشر النفس البشرية بتنفر منه ، وكل الأديان السماوية  
والقوانين الوضعية بتحرمه .
- طبعاً يا بنتي الشر مكروه ومحدث بيحبه إلا  
الأشرار بس الحياة فيها كل شيء من يوم ربنا ما  
خلق أبونا آدم .
- أنا عارفة حكاية قابيل وهابيل .
- عرفتي بقى إن الشر موجود والخير موجود .
- يا بابا مبقولش لأ ، الشر موجود لكن ما نشجعهموش  
وننشره .
- وهو فيه حد بيشجع الشر وينشره ؟
- الأفلام دي .
- دي مجرد أفلام .
- يعني إيه مجرد أفلام ؟ هي عشان أفلام تقوم تنشر  
الكلام الفارغ ده ؟

- أمال يعملوا إليه ؟
- يعني هي الحياة مفيهاش غير الحاجات التافهة ؟ الحياة مليانة صور جميلة، والتاريخ مليان بطولات وعبر.
- عندك حق يا بنتي .
- أنا ماشية لأنني مش طايقة الكلام الفارغ ده .
- انصرفت فكرية تاركة الأسرة تكمل مشاهدة الفيلم وتوجهت إلى حجرتها، وخلعت ملابسها، ورقدت في سريرها .
- جاءتها أمها، فقامت من رقدتها، وجلستا معاً على السرير، وقالت أمها :
- أنا عايزة أعرف هو أنتي مش ناوية تتجوزي ؟
- ليه يا ماما ؟ هو أنا مش بنت زي أي بنت ؟
- أمال إليه الحكاية ؟ كل ما يبجي لك واحد ترفضيه .
- أنا مش رافضة الجواز أنا رافضة اللي مش مناسب للجواز .
- يعني كل اللي اتقدموا لك مش مناسبين .
- طبعاً، وإلا كنت قبلت واحد منهم .

- يا بنتي مفيش إنسان على الفرازة .
- لكن نصبر وننقى اللي هو مناسب واللي يصبر ينول .
- يا خوفي يا بنتي بعد ده كله تقعي في واحد ما يستاهلكيش ، ويقع نقبك على شونة بعد ده كله .
- ربنا يستر .

تركنتها أمها ، أما هي فسرحت بفكرها ... إنها ليست رائعة الجمال ، ولكنها جميلة وجذابة ، كل مشكلتها أنها تعتز بنفسها كثيراً ، ولا تبتذل في أي تصرف من تصرفاتها أو قول من أقوالها . أما بالنسبة للزواج فقد قالت لنفسها وكأنها تخاطب شخصاً آخر :

- إن الزواج في الأساس جنس وامتلاك للجسد ، وإن جسدي هبة من الله يجب أن أصونها ، وأحافظ عليها ، ولا أفطر فيها ، ولا أعطي جسدي إلا لمن يستحقه .. إن الذي يعطيني قلبه أعطيه جسدي ، لأن الذي يعطيني قلبه يعطيني كل ذاته ، وعندئذ يستحق أن أعطيه جسدي الذي هو أعز ما أمتلك .



نهضت في الصباح، وتناولت إفطارها ثم توجهت إلى  
مقر عملها وعندما كانت جالسة أمام مكتبها وجدت  
جارتها وزميلتها (ريري) غائبة عن العمل .

بعد فترة رن جرس الهاتف الموجود على مكتب رئيس  
القسم .. رفع رئيس القسم سماعة الهاتف ثم نادى على  
فكرية .

— تليفون عشانك يا آنسة فكرية .

توجهت فكرية إلى رئيس القسم وتناولت منه السماعة  
وقالت :

— ألو

سمعت صوتا يقول :

— الآنسة فكرية ؟

— أيوه مين معايا ؟

— أنا وجدي أخو زميلتك ريري .

— أهلا وسهلاً .

— لو سمحتي أختي مريضة وبعد إذنك تبليغي لها  
مرضي ولو سمحتي تجيبي لها الجواب من شئون  
العاملين وتعددي عليها في البيت وأنتي مروحة .

— طيب ما تيجي أنت تاخذ الجواب .

— أنا في الشغل ومقدرش آجي .

— على عيني حاضر .

— شكراً آنسة فكرية .

توجهت فكرية إلى شئون العاملين، وقامت بعمل  
اللازم، ووقعت باستلام خطاب التحويل لتوصيله إلى  
زميلتها ريري .

قررت فكرية ألا تذهب إلى ريري بعد العمل مباشرة  
حيث انه وقت الغذاء وان تذهب إليها آخر النهار  
وفعالاً توجهت إلى عنوانها وضغطت على زر الجرس  
فتح باب الشقة عن شاب في نحو السابعة والعشرين من  
عمره قائلاً:

— أهلاً وسهلاً .

— أنا فكرية زميلة ريري في الشغل وحضرتك الأستاذ  
وجدي .

— أنا وجدي أخو ريري .

— عرفتك من صوتك .

— أهلاً وسهلاً اتفضلني هي مستنياكي .

دخلت الشقة وجاءت أم ريري فسلمت عليها وقال  
وجدي:

— دي يا ماما الأنسة فكرية زميلة ريري في الشغل .  
قالت الأم :

— أهلاً يا بنتي آسفين على تعبك .

— مفيش تعب ولا حاجة ، أمال هي فين ؟

— موجودة يا حبيبتي اتفضلي معايا .

توجهت معها إلى حجرة ريري التي استقبلتها معانقة  
وهي في السرير أعطتها خطاب التحويل ثم جعلتا  
تتحدثان بعد فترة قصيرة دخلت أم ريري قائلة :

— مصطفى قاعد بره .

قالت ريري :

— حاضر يا ماما .

سألت فكرية

— مين مصطفى ؟

— ده خطيبي .

— أستاذن عشان تقعد مع خطيبك .

- مش معقول تمشي على طول، تعالي معايا نقعد كلنا  
بره مع بعض، أنتي مش غريبة .
- يا أختي يا حبيبتي ميصحش .
- هو إيه اللي ميصحش، كلنا إخوات، كمان عايزة  
أقعد معاكي شوية وكمان تشوفي خطيبي .
- ربنا يسعدكم ببعض، بس خليني أمشي
- مستحيل .

قامت متثاقلة، وسارت معها فكرية نحو الصالون،  
وجلسوا معاً فترة قصيرة، استأذنت بعدها فكرية في  
الانصراف .

أثناء جلوسهم معاً، حاول وجدي أن يلفت نظر  
فكرية إليه، فقد أعجبه شكلها ورزانتها، بينما هي لم  
تعره اهتماماً غير عادي، فلم يلفت نظرها بأكثر من  
كونه شقيق زميلتها .

## الفصل الثاني

بعد انصراف فكرية، وعندما خلا وجددي بأخته  
ريري قال لها :

— هي فكرية متجوزة ؟

— لأ

— ولا مخطوبة ؟

— ولا مخطوبة .. إيه ؟ بتفكر في إيه ؟

— ومتجوزتش لحد دلوقتي ليه مع إنها جميلة ؟

— جالها كتير وهي بترفض .

— ليه ؟

— هي لها طبع خاص، وبتقول إنها لحد الآن ما

جالهاش الشاب اللي يوافق طبعها .

— يعني إيه لها طبع خاص ؟

- هي جد ودوغري وصريحة ، ومابتحبش اللف .
- والدوران ولا الكذب ، كمان هي معتزة بنفسها قوي .
- يا سلام ؟
- وحياء سلام .. يعني مش متقلبة وهوائية زي بعضهم .
- دي تبقى لقطه .
- هي فعلاً لقطه ، ويا بخت اللي هيتجوزها .
- طيب إيه رأيك أنا عايزك تخطبها لي .
- أنت يا وجدي ؟
- أيوة .
- مش معقول .
- ليه ؟
- عشان طبعك غير طبعها .
- وعشان كده أنا عايزها .
- أنت خفيف وهوائي .
- بعد الجواز كل شيء بيتغير .

- أنا مش ضمنك .
- استنجد وجدي بأمه لتحت ريري على مفاتحة فكرية  
في الارتباط به لكن أمه قالت :
- أنت بصراحة متضمنش أنت خطبت كام واحدة  
وسبتهم ، ومش عايزة أختك تكلم فكرية وبعدين  
تعمل زي اللي سبتهم .
- قال وجدي :
- لأ يا ماما دي حاجة تانية .
- توجهت الأم إلى ريري قائلة :
- معلش يا ريري كلميها عشان خاطري .
- حاضر يا ماما .
- يمكن المرة دي ربنا يسهل له .
- قالت ريري :
- ومطلوب مني إيه ؟
- تكلميها .
- يا ريت هي ترضى .

- مش بتقولني إنها دوغري وجد ؟ يبقى هتاخذ كلامك  
جد وبعدين دي زميلتك وعارفاكي كويس وهتعامل لك  
خاطر .
- معلش أنت أخويا وأنا عارفاك هوائي ومتقلب .
- بس دي البننت اللي هي ، حاولي تقنعيتها .
- على فكرة أنا هلاقي صعوبة في إقناعها .
- ليه ؟
- عشان هي مش سهلة زي ما أنت متصور .
- وربنا شطارتك .
- ربنا يسهل .

\*\*\*

أثناء جلوس فكرية معهم ، ظل وجدي يتأملها ، فقد  
فرضت شخصيتها الرزينة عليهم ، ورغم أنه حاول التملق  
إليها ، إلا أنها لم تعره اهتماماً مما جعله يتشبث بها  
... كان معجباً بهدوئها ورزانتها .

\*\*\*

عندما كانت ريري في عملها قالت لفكرية :

- إيه رأيك في وجدي ؟
- وجدي مين ؟
- أخويا اللي شفتيه .
- ماله ؟
- إيه رأيك فيه ؟
- من ناحية إيه ؟
- كله على بعضه .
- يعني إيه كله على بعضه ؟ انتي هتبيعيه شروة ؟
- يعني رأيك فيه عموماً .
- يعني عادي ومش وحش .
- يعني يعجب ؟
- تقصدي إيه يا ريري ؟ اتكلمي بصراحة من غير لف ولا دوران .
- عايز يخطبك .
- ما ينفعش .

- ليه ؟
- مش حاسة ناحيته بميل ولا جه على بالي ولا لفت نظري .
- انتي لسه بتقولي عادي ومش وحش .
- يعني عادي زي أي راجل .
- يعني مافيهوش عيب .
- دا حاجة والجواز حاجة .
- على العموم فكري وما تستعجليش في الرد .
- أنا من عادتي بفكر وما استعجلش .



عندما رجعت فكرية إلى منزلها فكرت في عرض ريري للزواج من أخيها ... إن أباها لم يجذب انتباهها فليس فيه شيء غير عادي كما بدا من الفترة القليلة التي جلست معهم ... إنه ضعيف الشخصية ويكاد يكون مهزوزاً ... مجرد إحساس لا تعرف إن كان صادقاً أم كاذباً ولهذا كانت مترددة في القبول أو الرفض .



- ظلت ريري تلح على فكرية وتعدد لها محاسن  
 وجدتي، وبعد أن ضاقت من كثرة إلحاحها قالت لها :
- بس أنا معنديش فكرة عنه ولا أعرفه .
- يا ستي اقعدي مع بعض واعرفوا نفسكوا كويس .
- يعني نعمل زي العيال الحبيبة ونقعد في الجنابن  
 ونتكلم ؟
- ماهو عشان تعرفوا بعض لازم تقعدوا مع بعض .
- يا ستي ماشي نقعد فين ؟
- مطرح ما يعجبك .. تعالي عندنا .
- معقول ده تفكيرك ؟
- ليه ؟
- آجي عندكم إزاي ؟ أنا مش رخيصة للدرجة دي .
- ما أقصدش والله .
- اتكلمي كلام معقول .
- خلاص هو ييجي عندكم .
- بصفته إيه ؟

- خطيبك .
- خطيبي إزاي وإحنا لسه ما اتفقناش ؟ وجايز أنا ما أوافقش .
- أمال تروحوا فين ؟
- في أي مكان يكون عام وهادي .
- اختاري المكان اللي يعجبك .
- حاضر يا ستي، يوم الخميس الساعة تلاتة، نتقابل قدام جنينة الأورمان من ناحية جنينة الحيوانات .
- ها أقوله وأخليه يستناكي .
- أبلغت ريري أخاها بالزمان والمكان، ونبهت عليها أن يكون رزينا في أقواله وأفعاله عندما يلتقيان، وأن يكون قليل الكلام وأن يكون مهذبا .
- تقابلا في الزمان والمكان اللذين اتفقا عليهما، وانتقيا أحد الأماكن الهادئة، بدأت هي الحديث قائلة :
- أنا ما أعرفش حاجة عنك عرفني بنفسك .
- أنا خريج كلية التجارة، وشغال في مصلحة المساحة، وزى ما أنتي عارفة عايش مع أمي وأختي، لأن بابا مطلق أمي من زمان، وعايش مع مراته الثانية وأولاده منها .

- طيب وهو أنت جاهز للجواز ؟
- أنا مؤجر شقة وكنت بدور على عروسة .
- يعني في إمكانك تتحمل مسئولية بيت وأولاد .
- طبعاً أيوه .
- سؤال أخير، أنت ما شفتنيش غير مرة واحدة، وما تعرفشي حاجة عني وإزاي عايز تخطبني ؟
- أختي ريري كلمتني عنك كتير .
- يعني أختك اللي كلمتك .
- لآ، أنا اللي كنت دايماً أسأل عنك .
- يعني عرفتني من السؤال من أختك .
- أختي زميلتك وعارفاكي كويس .
- زي ما أنت عرفتني كويس أنا كمان عايزة أعرفك كويس .
- أنا قلت لك كل حاجة .
- إديني فرصة أفكر .
- إنتي لسه هتفكري ؟

- واضح إنك دائماً مستعجل ، وأنا لسه عارفك من كام يوم .
- عايز أعرف رأيك بسرعة .
- حا أفكر وأكلم أختك .



عندما عادت إلى المنزل وخلت بنفسها جعلت تفكر .. كانت أحاسيسها متضاربة ، هل تقبله ؟ أم لا ؟ هو من حيث الشكل لا يعاب كل مؤهلاته للزواج معقولة ، أما شخصيته ففيها شيء من الاهتزاز ، ولهذا كانت حائرة بين القبول والرفض .

عندما عاد وجدي إلى منزله سألته أخته ريري :

- عملتم إيه ؟
- عملنا إيه يا شيخة ؟ دي قعدت تسألني ولا وكيل نيابة بيسأل متهم في جريمة .
- مش قلت لك إنها مش سهلة .
- واضح جداً .
- المهم رسيتم على إيه ؟

- قالت حافكر وأبلغ أختك .
- أديني معاها في الشغل كل يوم .
- أنا عاوز أعرف هي هتشاور أبوها وأمها والا الحل في إيديها هي ؟
- أبوها وأمها عارفين طبعها وواثقين فيها تماما، وسايبين لها حرية الاختيار لو وافقت هيوافقوا .

\*\*\*

ازداد وجدي تعلقاً بفكرية، فعندما وجدها صعبة المنال قرر الاستماتة في طلب يدها عملاً بمبدأ الممنوع مرغوب .. كان يريد أن يظفر بها ويحطم كبرياءها، أو على الأقل يشعر أنها لا تعلوه مرتبةً، أو أنه امتلك شيئاً بعيد المنال، كان كل من تقدم إليهن متلهفات على الزواج ولهذا زهد فيهن ... أما فكرية، فقد كانت نوعاً آخر .. كانت متمنعة عليه، وغير متلهفة على الزواج، وتحاول أن تدقق لتختار الأصلح، الأمر الذي جعله يتشبث بها حتى يشعر أنه فعلاً جدير بها لأنها اختارته وهو الأصلح .

\*\*\*

بعد بضعة أيام سألتها ريري عن قرارها فأجابتها أنها ما زالت تفكر ولما ألحت عليها أخبرتها أنها مترددة في القبول وأن الأمر يحتاج إلى وقت آخر للتفكير، إلا أن ريري قالت لها أنها منحت من الوقت ما فيه الكفاية، وأنها يجب أن تتكل على الله وتوافق كان وجدي كلما علم من أخته عن تردها في القبول يزداد إلحاحاً على أخته في الضغط عليها، وبالتالي تزيد ريري من ضغطها عليها .

أخيراً وتحت إلحاح ريري وافقت فكرية، الأمر الذي جعل وجدي يسارع في التقدم لها وتقديم الشبكة .  
شعر وجدي أنه أصبح في سبيله إلى تحقيق هدفه،  
فها هي أخيراً وافقت على الخطوبة مما يعني أنها اعترفت به شريكاً لحياتها في المستقبل .

جلس أبوها وأمها دون أن تكون معهما ... قال الأب :

— أنا مش عارف الجوازة دي مش مستريح لها ليه ؟

قالت الأم :

— صدقني أنا كمان مش مستريحة زيك لكن هنعمل إيه ما دام هي موافقة وده قرارها وهي حرة .

— بس دا جالها عرسان كتير أحسن من وجدي ميت مرة .

— ما هو ده اللي أنا باستغرب له .

— على العموم على كيفها وهي حرة .

تمت الخطوبة، وكان وجدي سعيداً بينما تقبلت هي هذه الخطوبة على أنها شيء عادي لا بد أن يحدث لكل فتاة، وهذا هو نصيبها، رغم أنه لم يكن اعتقادها تاماً بأنها اختارت الصواب .

أثناء فترة الخطوبة القصيرة خرجا معاً عدة مرات للتنزه، وكان يحاول أن يكون رزيناً أمامها، أو أن يجاربيها في الهدوء والرزانة، وكانت تلاحظ ذلك وتبتسم وتقول في نفسها :

— ما دام يحاول يبقى هيبجي منه في المستقبل .

وأقنعت نفسها أنها من الممكن أن تشكل منه إنساناً ذا شخصية قوية، طالما هو يحاول ذلك أمامها الآن .  
حقاً، إنهما لم يهيما ببعضهما حياً حتى يمكن أن يقال أن كلاهما أغرم بالآخر، وأنهما قبلا كل منهما الآخر كما تتم الخطوبة بين اثنين لم يعرفا نفسيهما قبل الزواج، وقد تصنع العشرة بينهما المحبة في المستقبل .

أسرع وجدي في إتمام عملية الزواج خوفاً من أن تتراجع فكرية عن قرارها ..

هذا من ناحية، ومن ناحية أخرى كان من عادته  
سرعة الانفعال .

تم بعد ذلك الزفاف وانتقلت إلى بيت زوجها ومضت  
أمور حياتها بصورة طبيعية كما تمر بين أي زوجين .  
كان وجدي في غاية السعادة، فهذا هو الآن قد نال مأربه  
ووصل إلى غايته .

كان ينظر إليها على أنها صعبة المنال، وهو بامتلاكه  
لها يكون قد حقق ذاته، شخصيته المهزوزة تجعله يشعر  
أنه أدنى مرتبة منها، ويجب أن يتساوى معها أو يرتفع  
إلى مستواها .. أي أنه يريد أن يحقق ذاته من خلالها.



مضت ستة أشهر من الزواج تزوجت بعدها ريري،  
وتركت العمل بناءً على رغبة زوجها، ولم تعد تراها إلا  
نادراً، بعد أن كانت تراها يومياً في مقر العمل .

لم يكن هناك جديد في حياتهما ... تمضي الحياة  
بينهما رتيبة بأمورها العادية كما هي بين أي زوجين .

لم يكن يضايقها سوى ضعف شخصيته، وأحسنت  
أنها وقعت في فخ نصبته لها أخته ريري، ولكنها  
تعاملت معه على أنه أمر واقع في حياتها وأن هذا قدر

الله، ويجب أن ترضاه، بعد أن صار زوجها، وله حقوق الزوج .

كان أحياناً يبدو مضحكاً وهو يحاول أن يكون ذا شخصية قوية، وكانت تحمد له هذه المحاولة، وتشجعه عليها عله يفلح في تغيير شخصيته .

كان أثناء فترة الخطوبة القصيرة جداً يحاول إخفاء ضعف شخصيته إلا أنها ظهرت واضحة جلية بعد الزواج .



مرت سنتان على هذا الزواج، رزقا خلالهما بطفلة جميلة أسمياها (رجاء).

كانت فكرية تنظر إلى وجدي على أنه قدرها الذي لم تقتنع به، ولكنها رضيت بهذا القدر... كانت تشعر أن هناك فجوة بين تفكيرها وتفكيره، ولم تحاول من جهتها إثارة هذه الفجوة، حرصاً على استمرار حياة زوجية طبيعية، خاصة بعد أن رزقت بمولودتها (رجاء)، والتي وجدت فيها كل سلوتها .

## الفصل الثالث

فجأة بدأ وجدي يتغير، فقد أصبح كثير الغياب عن منزله ولا يبدي اهتماماً بشئون أسرته .

ذهبت فكرية إلى منزل ريري، وأخبرتها بتغير أحوال أخيها . قالت لها ريري :

- جايز يكون مشغول في عمله ، وأنتي ما سألتيهوش ليه ؟
- أمرك عجيب ، ده جوزك وأبو بنتك ، ومن حقت تعرفي .
- أنا مراته ومفروض يقول لي على اللي شاغله ومغيره .
- طيب اسأليه .

— وليه مش عايز يقول ؟

— لو سألتني هتعرفي هو متغير ليه .

— لو كان عايز يقول كان قال ، إنما كده مش عايز يقول ولا عايز حد يعرف .

- مش هيجرى حاجة لو تسألينه .
- كرامتي فوق كل شيء، أنا معملتش حاجة تزعله،  
علشان كده لا يمكن أسأله.
- لكن المفروض تحسسيه إنك بتسألني عليه .
- أنا لو كنت غلطانة في حاجة كنت أعتذر له، ومش  
عيب إنني أعتذر لو كنت غلطانة .
- أمال لو تشوفي مصطفى جوزي بيعمل في إيه كنتي  
تقولي إيه ؟
- بيعمل فيكي إيه ؟
- شخط ونطر وشتيمة، وأحياناً ضرب .
- ليه تخليه يشتمك ويضربك .
- حا أعمل إيه ؟
- تمنعيه عن كده .
- هو طبعه كده .
- لازم أنتي بتغلطي غلط كبير .
- لا كبير ولا حاجة بس هي تلاكيك .
- وليه تستحملي ده كله ؟

- لازم أستحمل عشان البيت ما يتهدش .
- على حساب كرامتك .
- أنا بعتبر كرامتي هي كرامته .
- لا هو له كرامة وإنتي ليكي كرامة .
- عشان نعيش لازم كرامتنا تكون واحدة .
- يعني تلغي كرامتك وتبقى كرامته هو بس ؟
- أنا راضية بكده .
- أنتي بتحبيه ؟
- طبعاً مش جوزي .
- لو مكنش جوزك كنتي تحبيه ؟
- أنا عايشة في الواقع ، والواقع بيقول إنه جوزي ،  
ولازم أستحمله .
- بس مش للدرجة دي .. شتيمة وضرب .
- أنا واخدة على كده ومستحمله .
- والله دي حياتك وأنتي حرة فيها .
- انتي كده بتعامليه كأنه واحد صاحبك مش جوزك .

- وهل معنى إنه جوزي أتنازل عن كرامتي ؟
- مفيش كرامة بين الراجل ومراته .
- قلت لك لأ .. فيه .. هو له كرامة وهي لها كرامة، ولو فقدوا كرامتهم يبقى مينفعش يكونوا زوجين .
- المفروض كل واحد فيكم يطاطي شوية عشان المركب تمشي .
- قلت لك أنا ما غلطتش في حاجة تزعله والعواطف ما بتنشحتش وأنا لو كنت غلطانة في حقه كنت سألت عليه .
- أنا حا أكلمه وأعرف منه إيه الحكاية .
- اعلمي اللي يعجبك .



فكرت فكريه كثيرًا في الأمر الذي جعل زوجها يتغير، قالت لنفسها إنها لم تقصر في أي واجب من واجباته الزوجية، وظلت تدقق في تصرفاتها عليها تجد شيئًا أغضبه فلم تجد، كما أنه لم يبد أية شكوى من أي تصرف منها، معنى هذا أن مؤثرًا خارجيًا طرأ

عليه وجعله يتغير، وبالقطع هذا المؤثر لابد أن يكون امرأة .. وفي هذه الحالة يجب ألا تهتم بغيابه طالما هو اختار غيرها وفضلها عليها .

قابلت ريري أباها وجدي ولما سألته عن سبب تغييره مع زوجته قال لها :

— بصراحة مبهتت طايقها .

— ليه ؟

— مش عارف .

— إزاي مش عارف ؟ مش هي دي فكرية اللي كنت هاتتجنن عليها ؟

— كنت .

— والوقت ؟

— اتغيرت من ناحيتها .

— ليه ؟ إيه اللي حصل منها ؟

— محصلش حاجة .

— هل هي مقصرة في حقك ؟

— الحقيقة لأ .

- طيب الست مش مقصرة في حاجة واخذ منها موقف ليه ؟
- قلت لك زهقت خلاص .
- يعني الناس في إيدك لعبة يا وجدي؟ تحب وقت ما تعوز وتنسى وقت ما تعوز؟
- اللي حصل يا ريري .
- وبنتك خلاص مالهاش اعتبار عندك ؟
- ها يجرى لها إيه ؟ هي مع أمها .
- ياه، للدرجة دي ؟ حتى بنتك .
- أنا مطمئن عليها عشان مع أمها .
- اعمل اللي يعجبك يا وجدي بس لازم تعرف إنك أنت اللي خسران .. أنت معاك جوهرة، ست مفيش زيها .
- لم تصل معه إلى رأي قاطع ، أو سبب واضح وتركته على أمل أن تعود إليه مرة أخرى .



فجأة أيضاً .. انقطع وجدي عن الحضور إلى منزله ،  
بعد أن كان غيابه متقطعاً ، ولما حضرت ريري لزيارة  
فكرية أخبرتها بانقطاع أخيها عن المنزل ، فطلبت منها  
ريري أن تبحث عنه ، وتسأل عليه ، فرفضت قائلة :

— أنا مش هاشحته .

— أنت مراته .

— هو حر عايز يبجي محدش حايشه مش عايز اللي  
يعجبه .

— بقول لك إنتي مراته .

— أنا ماغلطش وماقصرتش ، وعارفة تمام واجباتي  
كزوجة ، ومغيش ما يدعو لأنه يهجر البيت .. على  
العموم ينام على الجنب اللي يريحه  
قالت ريري :

— دي مش معاملة .

— عايزاني أعمل إيه ؟ ألف في الشوارع وأنادي على  
راجل سايب مراته وبنته

— مش عارفة أقول لك إيه .

- لا تقولي ولا تعيدي، اللي حصل حصل، وده أخوكي  
اللي كنتي بتلحي علي عشانه وآدي النتيجة .
- يعني أنا كنت عارفة إنه هيتغير كده ؟
- بدل ما تسأليني أنا، روعي اسأليه هو وشوفي هو  
ساب البيت ليه .
- أنا هاكلمه وأعرف كل حاجة .
- لما تعرفي قولي لي، ولو كنت غلطانة في حقه  
عرفيني، ولو إني متأكدة إن السبب مش مني أنا .
- أمال من مين ؟
- الله أعلم بقى .
- مصيري هاعرف .
- هتعرفي إيه، ده أخوكي وأنتي عارفاه، كنتي شوفي  
له واحدة زيّه منقلبة وهوائية .
- معلى مصيره يرجع للبيت .
- ولا ميرجعش، مبقتش فارقة .
- إزاي ؟
- اللي يسيب بيته مرة، يسيبه مرة ثانية وتالته ..

فجأة أيضاً وصلتها قسيمة طلاقها من وجدي .. لم تهتم .. كما لو كانت تتوقع ذلك ... أطرقت قليلاً ثم هزت رأسها قائلة لنفسها :

— على كيفك يا وجدي، أنت اللي اخترت، وأنت عارف إنني مش ضعيفة، وأنت اللي خسرت، وبكرة الأيام تثبت لك .



طلب منها أبوها وأمها أن تقيم دعوى طلب نفقة لها ولا بنتها، إلا أنها رفضت بإصرار رغم إلحاحهما عليها فقد قالت لهما :

— لا يمكن أقبل منه ولا حتى جنيه، يغور بفلوسه .

قالت الأم :

— يا بنتي ده حق بنتك وحقك .

— مش عايزاه .

قال الأب :

— جايز حقك تتنازلي عنه لكن حق بنتك إزاي تتنازلي عنه ؟

— بالنيابة عن بنتي مش عايزاه، وهاربيها أحسن تربية، ومش حا أخليها تحتاج حاجة أبداً، والحمد

لله أنا موظفة ولي دخل ومش محتاجة حاجة من حد .

- هو كده المستفيد وأنتي الخسرانة .
- بالعكس انا استفدت بنتي ، وخلصت من إنسان تافه .
- مش ده اختيارك ؟
- أيوه لكن اتغشيت من كلام أخته عنه .
- وصدقتيها ليه ؟
- يعني أنا كنت عارفة إنها بتخدعني .



- عندما علمت ريري بطلاق فكرية من أخيها ذهبت مسرعة إلى فكرية وقالت لها :
- دي غلطة وإن شاء الله هيصلحها .
  - مش حاتتصلح يا ريري اللي باع يتباع .
  - مصيره يرجع لبيته .
  - مبقاش بيته خلاص ، بقى بيتي أنا وبنتي ، أما هو الله يسهل له بعيد عننا .
  - ليه يا فكرية ؟ هو انتي ملكيش عزيز ؟

- إيه يا ريري ؟ انتي بتقولي العكس ، هو اللي باع  
ومالوش عزيز ، دا حتى باع بنته ضناه ، يبقى مين  
فينا اللي مالوش عزيز وبايع الكل والكيلة .
- ما أنكرش إنه غلطان .
- يا ستي غلطان مش غلطان هو انتهي خلاص والله  
يجازي اللي كان السبب .
- تقصديني ؟
- طبعاً ، تنكري إنك السبب في جوازنا ؟
- أنا آسفة يا فكرية .
- آسفة ؟ في النهاية آسفة ؟ أتجوز واحد لمدة سنتين  
وبعدين يطلقني ... أتجوز واحد ملوش شخصية ؟  
ذنبى إيه ؟ أنا قلت اللي حصل حصل وبكرة يبقى  
له شخصية أتاري مفيش فايده هو كده وخلقته كده .
- معلش يا فكرية يعني أنا كنت عارفة إن ده هيحصل .
- أخوكي وأنتي عارفاه ليه تبليني بيه ؟
- مقدرش أقول أكثر من إني آسفة .
- مفيش داعي للأسف لأنه خلاص انتهي .

- والبنت ؟
- ما يستاهلهاش.. ما يستاهلش إنها تكون بنته ، أو هو أبوها وأنا حا أربيها أحسن تربية إن شاء الله .
- ربنا يخليكي لها .
- بس برده خليكى فاكرة إنى ما كنتش موافقة عليه لولاكى .
- ححك علي يا فكرية .
- وانصرفت .



جعلت فكرية تفكر فيما حدث ، لقد تزوجت وجدي مع خداع أخته لها ، وكانت واثقة في حديثها ، واستطاع هو أن يمثل عليها دور الشاب المسالم ، وقد كان فعلاً مسالماً لا يثير المشاكل .

لقد أعطته جسدها الذي هو أعز ما تملكه إلا انه لم يعطها قلبه .. أحست أنها أعطته شيئاً غالياً ثميناً لم يقدره حق قدره . كان يحز في نفسها أنها أعطت جسدها لمن لا يستحق .

كان ما حدث لوجدي أنه التقى برشا، وهي فتاة جميلة وغاية في الشياكة، بهرته بملبسها الضيق ومكياجها الصارخ وأنوئتها التي تبالغ في إبدائها، كانت رشا في مأمورية للتدريب في مقر مصلحة المساحة في الجيزة لمدة شهر حيث يعمل وجدي ... التقى بها فشدت انتباهه وبدأ يهيم بها ولاحظت هي ذلك فأظهرت له القبول لا التمتع وهكذا بدأ يخرجان معاً بعد مواعيد العمل للتنزه .

رأت فيه أنه مناسب لها فكل الذين عرفتهم قبله كانوا يريدون المتعة فقط ولا يريدون الزواج أما وجدي فكان على استعداد أن يبيع الدنيا بما فيها في سبيل الفوز بها .

افتتن بها وصادفت هواه شخصيته المهزوزة جعلته ينبهر بها، فقد بهره الشكل الجميل ووقع تحت تأثيره، كما وقع قبلاً تحت تأثير شخصية فكرية .

كانت رشا هي الشكل الجميل والمضمون الضعيف، بينما كانت فكرية هي الشخصية القوية ذات المضمون الجيد وكان هو بين الشخصيتين الضعيف .

وجعلته ينسى نفسه وبيته ولما أخبرها برغبته في الزواج منها رفضت مع أنها تتمناه، فهو النموذج المناسب جداً لرغباتها ... واشترطت عليه كي توافق أن يطلق زوجته لأنها لا تقبل أن يشاركها فيه أحد - على حد قولها

- كما أن الشرط الثاني هو أن يطلب نقله من عمله بالقاهرة إلى الإسكندرية حيث مقر عملها ومقر أسرتها .

كان مطلبها في طلاقه من زوجته، ونقل عمله إلى الإسكندرية، اختباراً له ولطاعته لها فإذا وافقها قبلت الزواج منه، ليس لأنها لا تسمح أن يشاركها فيه أحد كما زعمت له، كما أنه اختبار لقدرته على الانصياع لأوامرها، أما إذا لم يوافق فسوف ترفض الزواج منه، لأنها لا تريد أن تتزوج من رجل يأمرها بل هي التي تأمره، وقد نجح في الاختبار مبدياً الطاعة الكاملة، وكان هذا ما تريده .

فعندما قال لها :

— انقلي نفسك هنا في القاهرة .

— قالت له :

— لا انقل أنت نفسك عندنا ... اسمع الكلام من الآن .

— حاضر عشان خاطرك أعمل أي حاجة .

استجاب لها وهو مسلوب الإرادة، وطلق زوجته، وطلب نقله إلى فرع المصلحة بالإسكندرية .. وكان لها ما أرادت .. جعلته ينسى نفسه، بل وينسى ابنته الطفلة البريئة، وأصبح يدور في فلكتها .. كان كل همه أن ينال رضاها ولو على حساب كرامته وعلى حساب ما عداها،

المهم لها أن تستأثر به وحدها وتفعل به ما تشاء .  
تزوجته رشا، ليس هو الذي تزوجها، وإنما هي  
التي تزوجته هذا ما يمكن أن يقال  
عنه .. كان كل من يتقدم لها ترفضه، لقد كانت  
تشعر أنه يريد امتلاكها رغم أنهم كانوا يحاولون  
إرضاءها، لكنها بخبرتها الأنثوية عرفت أن هذا الرضا  
مؤقت لحين امتلاكهم لها، فلم تنطل حيلهم عليها،  
فهي لا تريد رجلاً يملكها وإنما تريد رجلاً هي  
التي تملكه وتسيطر عليه ويخضع لأوامرها .. ووجدت  
في وجدي الرجل المناسب لها، كانت الأنانية طبيعتها  
وحب التملك، وأن تفعل هي ما تريده لا ما يريده  
غيرها .

كان وجدي في حالة توهان كامل، وكأنما سحر له  
وكانه لا يعي ما يقول وما يفعل سوى أن يستجيب  
لها وينفذ أوامرها .. كان كالآلة التي يديرها صاحبها .

وجدت فيه عجيبة لينة، ورجلاً رخواً تستطيع أن  
توجهه أينما تريد، وأن مثل هذا النموذج من الرجال هو  
الذي تريده زوجاً، حتى تستطيع أن تفرض سيطرتها  
عليه وتتباهى أمام الغير بقوتها وضعفه أمامها، فهي لا  
تريد زوجاً تبدو أمام الغير ضعيفة أمامه .

عرفت كيف تجعله دائما مشدودا إليها، مشتاقا لها، بما تبديه من أفعال أنثوية ماكرة وملابس تبرز مفاتنها، وحركات لها مدلولها الجنسي بحيث يظل دائما هائما بها، ساعدها على ذلك ضعف شخصيته ونظرته الجنسية الدائمة لها . استطاعت أن تلمس نقطة الضعف منه وأن تسيطر عليها تماما .

كان هو الشخص المناسب لطبيعتها، ويكفي أنها عندما طلبت منه أن يطلب نقله من القاهرة إلى الإسكندرية أجابها أيضا .. وهكذا انقطعت صلته بزوجته وابنته واستطاعت رشا أن تسيطر عليه تماما، وتجعله عجينة بين يديها تشكلها كيفما تريد .

استطاعت أن تشكل حياته معها كما تريد هي، وليس كما يريد هو فأصبح لها الخادم المطيع الذي يسارع في تلبية رغباتها، فكان لها خادما مطيعا أكثر منه زوجا .



كان هو الذي يقف في المطبخ، ويساعدها في طبخ الطعام، ويغسل المواعين، وهو الذي يقوم بتنظيف الشقة، وهو الذي يجلب المشتريات من السوق .. كان يقوم بعمل كل شيء تطلبه منه رشا، وكان يجد في رضاها سعادته ... كان خادما مطيعا أكثر منه زوجا آمرا .. كان بعد

كل عمل تطلبه منه ، ويؤديه تضمه إلى صدرها مظهرة له رضاها عنه ، وكان يجد في ذلك منتهى سعادته .. كانت تعرف تماماً كيف يعمل ما تأمره به ، فيبادر مسرعاً إلى تنفيذها حتى ينال المكافأة التي كانت تقدمها له .

ناسب ذلك طبيعتها المتسلطة وجعلها ضعفه أمامها أن تتمادى في فرض سيطرتها عليه وبمرور الأيام استمرأ ذله وضعفه أمامها ولم يشعر أنه أصبح في حياتها لعبة تلهو بها وكرة بين قدميها .

## الفصل الرابع

مرت السنوات وأنجب منها ولدين وبنت واحدة خلال عشرين عاماً مضت على زواجه من رشا، ولم يتذكر خلالها ابنته رجاء وكيف تعيش، وهل تزوجت أمها أم لا ... لم يخطر على باله شيء من ذلك .

ذات مرة أخبرها على استحياء برغبته في رؤية ابنته رجاء وكان متردداً ...

قالت له :

— هتشوفها ليه، هي عايشة مع أمها مستريحة، ومش عايزاك في حاجة .

— عايز بس أظمن عليها .

— اظمن يا خويا هم لو كانوا عايزينك كانوا سألوا عليك، وبلاش تجيب السيرة دي تاني .

إلى هذه الدرجة استطاعت أن تقطع الصلة بينه وبين  
ابنته، كانت تقول له ساخرة :

— لو كنت عايز تشوف طليقتك مع السلامة روح لها .

وكان يرد عليها في انكسار :

— وده معقول يا رشا هو أنا لي حد غيرك .

حتى عندما ماتت أمه قالت له :

— رجلي على رجلك .

وذهبت معه إلى القاهرة، حيث قام بعزاء أخته، ثم  
عاد إلى الأسكندرية برفقتها كما ذهب وكأي غريب يؤدي  
واجب العزاء .

عندما تزوجت أخته ذهبت معه إلى القاهرة ليقوم بتهنئة  
أخته والعودة أيضاً كأى شخص يؤدي واجباً مفروضاً عليه .

في عزاء أمه كان أخواله هم الذين يستقبلون المعزين،  
كما أنهم في فرح أخته كان أخواله هم الذين يستقبلون  
المهنئين، ولهذا نظر إليه أخواله نظرة احتقار وعدم  
تقدير، ثم بعد ذلك انقطعت الصلة تماماً بينه وبين  
كل أقربائه .



يوماً جلس وجدي مع نفسه يفكر فيما وصل إليه . قال لنفسه : إن فكرية كانت تعامله باحترام، ولم تقصر في واجباته كزوجة، ولم تخذش حيائه بكلمة ،لأنها كانت عفيفة اللسان، أما رشا فكيف وصل به الحال معها إلى هذه الهوة من الذل والانكسار .. إنه منذ البداية وقع أسيراً لجمالها، واضطر أن يخضع لها حتى لا يفقد هذا الجمال، وعلى مر الزمن تعود على الذل، وأصبح الذل بالنسبة له شيئاً عادياً، وأصبح أسيراً لها لا يستطيع الفكاك من أسرها .

كان من نتيجة ضعفه أنه لم يتدخل في تربية أولاده، فلم تسمح له رشا بذلك، وطلبت منه أن يترك الأمر لها في كيفية تربية أولادها قائلة :

— دول أولادي وأنا حرة فيهم .

وعندما قال :

— برده هم أولادي .

صرخت فيه قائلة :

— أنا اللي هربيهم بمعرفتي .

هذا ما جعل الأولاد لا ينتمون لأبيهم عشر ما ينتمون لهم، فقد وجدوا فيه ضعفاً متناهياً، وأن الأمر كله

لأهمهم.. كان التدليل الزائد من الأم، وضعف لأب جعلهم لا يخافون من العقاب عندما يخطئون .. وهكذا فسدت أخلاقهم، وضاع مستقبلهم بسبب سوء التربية، وغياب دور الأب ... فشلوا جميعاً وضاع مستقبلهم .

انحرفت الابنة، أحبت شاباً، وهربت معه إلى حيث لا يعلم أحد، أما الولدان فقد أدمنا المخدرات، وضاع مستقبلهما، وأصبحا يبيعان المياه الغازية على شواطئ الإسكندرية بعد أن هجرا منزل أبيهما .



عاشت ريري مع زوجها مصطفى تحت ضغط انفعالاته المتقلبة، فتارة يعاملها بالحسنى، وفجأة ينقلب عليها، وهكذا ذاقت معه الذل والهوان، فكما كان أخوها ذليلاً مع زوجته رشا كانت هي ذليلة مع مصطفى، ولكنها كانت مقهورة، مغلوبة على أمرها، ماذا تفعل وقد ماتت أمها، وأخوها تكاد تكون الصلة بينهما مقطوعة، ووالدها يعيش مع زوجته الأخرى، وأولاده منها منذ زمن طويل، فإلى أين تذهب إذا غضبت من مصطفى وتركت له المنزل ؟

لهذا كانت تخضع له في ذلّه محمية بأولادها الثلاث والتي كانت تتحمل الذل من أجلهم .

غير أن ما كان يريح قلبها أن زوجها يحب أولاده  
جداً ، ولا يبخل بشيء عليهم ، كان في حبه لأولاده عوضاً  
لها عن سوء معاملته لها في بعض الأحيان .



قامت فكرية بالاهتمام الزائد بابنتها ، ورفضت  
أن تتزوج رغم صغر سنها ، ورغم من تقدموا لها من  
الخطابين ، وإلحاح أهلها عليها بالزواج . قال لها أبوها :

— يا بنتي حرام عليك ، أنت لسه صغيرة وليه تدفني  
نفسك في الحياة ؟

ردت قائلة :

— لا يمكن أجيب لبنتي أب غير أبوها .

قالت أمها :

— ممكن تتجوزي ورجاء تعيش معانا .

— مش ممكن يا ماما رجاء تعيش مع حد غيري ،  
أنتي عارفة إنها كل حياتي ودينيتي .

— بس كده أنتي بتضيعي شبابك وعمرك ، وخايفة  
بيجي يوم وتندمي .

— لا يمكن أندم وهي معايا كفاية هي علي .

يئس أبوها وأمها من الحديث في هذا الموضوع، وسلما أمرهما إلى الله في أمر ابنتهما.

خلت فكرية بنفسها وجعلت تفكر .. ما هذا الذي يحدث؟ أيا لقلني وجلي بعد أن تحايلت علي أخته حتى أوافق عليه؟ لم أكن موافقة، ولكنها استطاعت بالاحاحها وأحاديثها الكاذبة عن أخيها أن تقنعني بالموافقة، وقد صدقتها ووثقت فيها بحكم الزمالة والصدائة، ولأنها لا يمكن أن تغرر بي ولكن حدث ما حدث، وهذه هي النتيجة ...

هجرني، وهجر بيته، وسار وراء نزواته غير مبالي وغير مقدر للمسئولية التي كان يحملها، بل ألقى بها في الضياع غير عابئ بما قد يحدث .

لكن يعز علي كبريائي الذي أعطيته جزءاً منه متنازلة عنه لأنه زوجي، ثم هو الذي يطلقني؟ هو الذي يهجرني؟ إنه لم يقدر كبريائي الذي منحه له، ولكنني سوف أثبت له أنني لم أهتز لما فعله، بل سأظل قوية شامخة رغم أنفه، وليعلم أنه أصبح لا يمثل لي شيئاً أندم عليه .

لست نادمة عليه، ولكنني نادمة علي ما أعطيته له من وفاء وإخلاص لا يستحقه، ويتركه إلى واحدة غيري .

أية خسة ووضاعة هذا الرجل ؟

ولكن الذي يؤثر في ويؤلني أنه أخذ جزءاً من جسدي لفترة تجاوز السننين وهو لا يستحقه أعطيته جسدي ولم يعطني قلبه ... إنه لم يعطني قلبه ... وهذا أكيد لأنه لو أعطاني قلبه لما حدث ما حدث، ولكني للأسف أعطيته جسدي فنال منه ما نال لمدة سنتين . كان قراري دائما هو أن أعطي جسدي لمن يعطيني قلبه، فجسدي هو ذاتي الذي يضم قلبي وعقلي وكلي، فمن يمتلك جسدي فإنه يملكني كلية، والحمد لله أنه لم يأخذ من جسدي إلا قليلاً ولكن أيضاً كل هذا الإحساس بالألم والندم ليس على وجدي لأنه لا يستحق، فمن باع يباع، ولكن على جزء من عمري ضاع مع من لا يستحقه، ولم يقدره حق قدره، ولكني أيضاً كسبت شيئاً غالياً وثميناً وأغلى من الوجود، فقد أعطاني ابنتي (رجاء) .. رغم كل الألم على ضياع سنتين من عمري إلا أن هذا لا يساوي نظرة وابتسامة من ابنتي رجاء التي أصبحت كل أملي في دنياي، أصبحت هي الماضي والحاضر والمستقبل، الماضي الذي فقدته، والحاضر الذي أعيشه، والمستقبل الذي أنتظره، وسوف أكرس عمري كله لها لتعيش هي ما لم أعشه أنا .

زميلها في العمل الأستاذ محسن ينظر إليها بكل إعجاب وحب، وكان في الثلاثين من عمره أي أنه كان يقاربها سنًا ذات يوم قال لها :

- مدام فكرية ... عايز أتكلم معاكي ممكن ؟
- اتفضل يا أستاذ محسن .
- ما ينفعش الكلام هنا .
- أمال نتكلم فين ؟
- مطرح ما يعجبك .
- فيه إيه يا أستاذ محسن ؟
- حضرتك عارفاني كويس وعارفة إني راجل جد .
- عارفة يا أستاذ محسن .
- عشان كده بأترجاكي نقعد مع بعض شوية .
- فهمت . تقصد الجواز .؟
- أيوه .
- لا يا أستاذ محسن .
- طيب نقعد ونتكلم ونشوف حنقول إيه .

- مبدا الجواز مرفوض أساساً منك أو من غيرك .
- أنا عارف عشان رجاء .
- أيوه .
- طيب نقعد ونتكلم برده عشان رجاء .
- برده عشان رجاء الجواز مرفوض الكلام فيه .
- هكذا كان ردها مع من يطلبها للزواج فقد كانت ترفض حتى الحديث فيه ..
- أدخلت ابنتها قلبها، وأغلقت عليها باب قلبها حتى لا يدخل أحد قلبها .
- كان محسن شديد الإعجاب بفكرية، ولهذا بعد عدة أيام أعاد الكرة . قال لها:
- أرجوكي يا مدام فكرية خلييني أتكلم معاكي .
- تاني يا أستاذ محسن ما قلنا الموضوع ده مرفوض .
- هو أنا إنسان وحش للدرجة دي ؟
- لا والله أنت يا أستاذ محسن إنسان محترم بس أنا خلاص .
- خلاص إزاي وأنت في عز شبابك .

— شباب إيه يا أستاذ محسن ؟ شبابي كله لرجاء  
ومش لحد ثاني .

— حرام عليكى هو أنت عشان وقعتي في واحد وحش  
يبقى كل الناس وحشين .

— أبداً والله الناس حلوة وكويسة بس أنا خلاص  
أخذت نصيبي لغاية كده والحمد لله .

— مش معقول يا مدام ارحمي نفسك .

— ارحمني أنت يا أستاذ محسن أرجوك سيبنى في حالي

— يعني مفيش فايده ؟

— فعلاً مفيش فايده .

— يا خسارة يا مدام .

لم ييأس محسن، فذهب إلى والد فكرية ووالدتها،  
وطلب منهما التدخل لدى فكرية وإقناعها بالزواج، أما  
بخصوص رجاء فإنها سوف تعيش معها، وسيعتبرها  
ابنته .

توجه الوالدان إلى فكرية، وحاولا إقناعها، إلا أنها  
رفضت وبإصرار رغم إلحاحهما .

\*\*\*

ترعرعت رجاء في كنف أمها، وأولتها أمها رعاية كاملة، وأصبحت رجاء هي كل أملها في الحياة، ولهذا عاشت من أجلها . قامت فكرية بدور الأب والأم معاً، فأجادت دور الأب في الإنفاق على ابنتها وتلبية رغباتها المعقولة وعدم حرمانها من متع الحياة المشروعة، وأجادت دور الأم في الملاحظة والرعاية والتوجيه .

كانت لابنتها الأب والأم والعم والخال وكل الأهل والأقارب . قامت بتربيتها كما تريد، فقد زرعت فيها الكبرياء والتفوق وعزة النفس والاعتداد بها، وذابت الأم والابنة كل منهما في الأخرى .

انتقلت لها صديقاتها بعناية حتى لا تتأثر بخلق أو فعل لا تريده لها، وقد صدعت الابنة تماماً لأنها كانت ترى في أمها كل دنياها، وأنها ليس لديها دنيا سواها .

كان بينهما حب غريب، كل منهما لا تطيق فراق الأخرى، وذابت كل منهما في الأخرى كأنهما شخص واحد، فرح واحد ، ألم واحد، تبغي كل منهما مرضاة الأخرى، وتتفانى في إسعادها ... الأم في الرعاية الكاملة للابنة والابنة في السمع والطاعة .

ولهذا تفوقت رجاء في دراستها، وانتقلت من مرحلة دراسية إلى أخرى وهي متفوقة دراسياً وأخلاقياً،

استطاعت أمها أن تزرع في نفسها العزة والشموخ والأخلاق  
الفاضلة، التي جنبتها أي زلل في حياتها.

حجبتها أمها عن أهل أبيها وأفهمتها أن أباهما غادر  
الوطن إلى الخارج ولم يعرف أحد إلى أين ذهب وما هو  
مصيره أما بالنسبة لأهل أبيها فهم لا يستحقون أن تعرفهم  
أو تمت لهم بصلة لأنهم دون مستواها علماً وخلقاً .



كان أخوها عماد ورشاد دائمي الاتصال بها وبزيارتها،  
كما كانت صلتها بابنة أختها رجاء ممتازة، وكانت  
رجاء تحبها جداً، وتعتبرها كل أهلها مع جدها  
وجدتها، فهما بمثابة الأب الذي فقدته، كما كانت  
هي بالنسبة لهما ابنة الأخت العزيزة، وفتاة تكاد  
تكون يتيمة الأب .. كانت الصلة بين رجاء وخاليها  
هي البسمة والضحكة التي تعم المنزل حين يحضران  
للزيارة، أو تذهب هي لزيارتها، وكانت فكرية في غاية  
السعادة بأخويها وعلاقتها بابنتها، لأنهما عوضاها عن  
فقدانها لأبيها، كما كانت تريد أن تشعر ابنتها أن لها  
أهل وأقارب تنتمي إليهم ... الجد والجدة والخالين .



شعرت ريري أن فكرية تكرهها، لأنها كانت السبب في زواجها من وجدي، ولهذا قطعت الصلة بها، حتى عن رجاء ابنة أخيها ... لم تحاول أن تراها أو تعرف شيئاً من أخبارها .

وهكذا انقطعت الصلة بين المرأتين، ولم تعد إحداهما ترى الأخرى، بعد أن كانتا تلتقيان يومياً في مقر العمل .

تعمدت فكرية أن تبتعد بنفسها وبابنتها عن أهل زوجها لاعتقادها أن ريري هي السبب في زواجها من أخيها، وأنها لم تكن مستريحة له لولا إلحاحها عليها، وأنها قدمت لها صورة زائفة غير حقيقية عن أخيها وقدمت لها صفات لم تجدها فيه بعد الزواج مع أنها وثقت في كلامها باعتبارها صديقة وزميلة ترجو لها الخير، ولا يمكن أن تخذعها .

ولما كان تأثير الأم على ابنتها قوياً وساحراً، فقد استجابت رجاء لكل أفكار أمها، معتقدة أن أمها لا تقول ولا تفعل إلا الصواب .

وهكذا فقدت رجاء صلتها تماماً بأهل أبيها، كما فقدت سابقاً صلتها بأبيها، وعاشت وكأنها يتيمة الأب، ولكنها وجدت في جدها وجدتها وخاليتها ما جعلها تشعر بدفء الأقارب .

كانت رجاء تنتقل من مرحلة دراسية إلى أخرى بنجاح وتفوق، وبفضل رعاية أمها الكاملة لها كما كانت أمها تنظر إليها وهي تتقدم في الدراسة وفي العمر أيضاً، إلى أن أصبحت شابة جميلة، على أنها امتداد لعمرها الذي سلبه منها وجدي .

كانت تجلس بجوارها، وهي تذاكر دروسها، ترفض أن تنام طوال سهرها للمذاكرة، وكانت رجاء ترجوها أن تنصرف للنوم فترفض لأنها لن يأتيها النوم بدونها فقد كانت حجرتهما واحدة بها سريران لنوم كل منهما .

وصلت رجاء في مرحلتها الدراسية إلى كلية الطب وكم كانت سعادة أمها بتفوقها وأحست أنها شكلت ابنتها كما أرادت وبالصورة التي رسمتها لها .

تقاطر العرسان في طلب رجاء للزواج، إلا أن أمها رفضت تماماً فكرة زواجها قبل أن تنتهي من دراستها، وعندما قالوا لها إنها من الممكن أن تكمل تعليمها وهي متزوجة رفضت قائلة :

— إزاي تبقى متجوزة وتكمل في كلية الطب ؟ ما ينفعش .

وعندما قالوا لها إنها من الممكن أن تتم خطبتها، ثم الانتظار حتى تنتهي من دراستها .

قالت :

— وليه ترتبط من الآن ؟ بعد ما تخلص يحلها ربنا .

كانت فكرية في غاية السعادة وهي ترى ابنتها متفوقة في دراستها، وأنها أصبحت شابة جميلة، يتهافت الشباب على طلبها للزواج، ولكنها حرصاً على مستقبلها فضلت أن تنهي دراستها أولاً .



تخرجت رجاء في كلية الطب، والتحقّت بالعمل في إحدى المستشفيات، وعندما تسلمت العمل ظلت أمها تبكي دهشت رجاء وقالت لها :

— ليه كده يا ماما ؟

— من فرحتي، حاسة إن الدنيا مش سايعاني من الفرحة، وإن ربنا عوضني بيكي خير وإن عمري ما راحش هدر .

أمسكت رجاء بيد أمها وجعلت تقبلها وهي تقول :

— ربنا يخليكي ليا يا ماما وأفضل طول عمري في حضنك .



انفردت رجاء بنفسها، وفكرت في أمها .. هذه الأم العظيمة التي حرمت نفسها من متع الحياة ولذتها من أجلها، وهي في عنفوان شبابها، ولم تنل حظها من الدنيا من أجل طفلة صغيرة ترعاها ، وتتعهدها بكل الرعاية، وتحوطها بكل الحب وكأنها لم تخلق إلا لها، بينما أبوها لاه عنها ولا يعرف عنها شيئاً .. هذه الأم لو ظلت تقبل قدميها قبل يديها لا توفيقها حقها ... إنها ليست بشراً ، بل هي أم في مصاف الملائكة وتعيش بين البشر .



أحست فكرية أنها تكاد تصل بابنتها إلى كل ما تصبو إليه، فها هي قد تخرجت في كلية الطب، وأصبحت طبيبة، ولم يتبق لها من أمنيات إلا أن تراها عروساً ثم زوجة سعيدة في بيت زوجها ثم تسعد بعد ذلك بأولادها .

كان الدكتور أمجد زميلاً لرجاء، وكان ينظر إليها بعين التقدير والإجلال نظراً لصفاتها الأخلاقية التي ورثتها عن أمها منذ الصغر، وشعرت هي بنظراته لها، ولم تنفر منه، لأنه كان جاداً في عمله، حسناً في سلوكه ..

كانت مثل أمها قوية وصريحة، قال لها يوماً :

— تسمححي يا دكتورة رجاء أتكلم معاكي كلمتين ؟

- اتفضل يا دكتور أمجد .
- عندك مانع أزورك في البيت .
- خير يا دكتور .
- لما واحد يطلب من واحدة إنه يزورهم في البيت  
تفتكري يبقى عشان إليه ؟
- طيب وهو أنت أخذت رأبي الأول ؟
- ما هو أنا بقول لك لو تسمحي ، ولو ما سمحتيش  
خلاص مش هزورك .
- يعني إليه ؟
- ثم قالت ضاحكة :
- أنت بتتلكك .
- أبدأً والله ، أنا عارف إنك حاسة بشعوري ناحيتك  
من غير ما أتكلم ، لأنك ذكية ولماحة ، ويا ستي  
دوغري كده من غير لف ولا دوران أنا بحبك وعايذ  
أخطبك بصراحة كده .
- ابتسمت وقالت :
- أنا بحب الصراحة ، وبصراحة موافقة .

كانت رجاء تميل لزميلها أمجد، فقد كانت ترى فيه شاباً جاداً، يعتز بنفسه وكرامته، ويتعامل مع الجميع برقة وأدب، وهو النموذج الذي تعجب به، وترغبه، كما زرعت أمها فيها هذه الصفات التي تعجب بها، ولهذا أحست قبله بعاطفة حب، لم تنكرها، وأخبرت أمها أن زميلها الدكتور أمجد يصبو إليها نظرات الحب، وأنها تشعر من حديثه مدى الحب الذي يقطر من كلماته، وأنها استجابت له عندما طلب منها أن يزورها في البيت ..

سألته أمها :

— وأنت شعورك إيه من ناحيته ؟

أجابت رجاء :

— بصراحة يا ماما إنسان محترم .

— يعني أنتي مستريحة له ؟

— أيوه يا ماما .

— خلاص على خيرة الله .

\*\*\*

توجا قصة حبهما بالخطوبة، وظهرت مشكلة كبرى ألا وهي كيف تستطيع الأم والابنة الانفصال كل منهما عن الأخرى ؟

ولما ناقشت رجاء خطيبها الدكتور أمجد في هذا الأمر  
قال لها :

— أنا لا يمكن أكون السبب في ابتعادك عن ماما وأنا  
من ناحيتي أتمنى نعيش مع بعض  
ثم ضحك وقال :

— على الأقل نوفر تمن الشقة .  
قالت رجاء :

— حبيبي يا أمجد .  
قال أمجد :

— مامتك ست عظيمة، ومين الإنسان الغبي اللي مش  
عايز يفضل معاها على طول ؟

اتفق الجميع على أن يعيشوا في شقة الأم بعد أن  
يقضيا شهر العسل في أحد الفنادق، تم هذا الاتفاق بعد  
أن تناقشت فيه الابنة مع أمها، فقد اعتادت رجاء  
ألا تخفي شيئاً عن أمها، وقبل أن تكون رغبة الأم في  
عدم الانفصال كانت رغبة الابنة، وقد توجت الرغبتان  
بموافقة أمجد على ذلك . . اشترطت عليهما أن يزوراها  
كل فترة قصيرة أثناء شهر العسل وألا ينقطعا عنها .

## الفصل الخامس

سارت الحياة برشا ووجدني على هذا المنوال، سيطرة تامة من رشا، وخضوع واستسلام تام من وجدي لرغباتها، ولم يعد يستطيع أن يتخذ قراراً في أمر من الأمور، وإنما القرار قرارها والأمر أمرها، والخضوع التام منه لها أنجب منها ابنه الأول، وعندما أراد أن يسميه رفضت، وقامت هي بتسميته (صلاح)

.. ولم يدر هو لماذا اختارت هي هذا الاسم، وعندما أنجب للمرة الثانية كانت طفلة، قامت هي بتسميتها (حنين)، ولم يدر أيضاً لم اختارت هذا الاسم، ثم أنجب ولده الثالث وأسمته (رمزي)، وكما سبق لم يعرف لماذا اختارت هذا الاسم.

كان كمن كان في سجن ومقيداً في قيد لا يستطيع الفكك منه أو فك أغلاله، وذات مرة فكر أن يتمرد ويفك قيده، ولكن إلى أين يذهب؟ أمه ماتت وأخته في بيت زوجها، ولا يعرف شيئاً عن أبيه، وأخوته من

أبيه .. هل يذهب إليهم الآن ؟ وماذا يقول لهم ؟

ليس أمامه سوى أخته ريري ، وهي تعيش مع زوجها ، ولا يعرف إن كانت سعيدة أم تعيسة ، كان كل ما يربطه بها هو الخطابات التي كان يرسلها إليها خلصة من وراء رشا ، وعلى فترات متباعدة، وكان يتلقى خطاباتها على عنوان مقر عمله وليس على بيته خوفاً من رشا ، فكان يقرأ الخطابات ثم يمزقها قبل العودة إلى المنزل .

وهكذا وجد أنه لا خلاص له من قيد رشا ، فاستسلم لذلك ، وخضع تماماً لما هو فيه من ذل وهوان .

أدركت رشا كل ذلك عنه ، واطمأنت إلى سيطرتها التامة عليه ، وأنه لا خلاص له منها.

تأثرت حياة وجدي الوظيفية بحياته العائلية ، فقد وصل إلى درجة كبيرة بحكم أقدميته في العمل لا بحكم كفاءته ، ولكنه لم يتبوأ مركزاً قيادياً ، بل ظل مرءوساً



ذات مرة عاوده التفكير في أخته ريري ، إنه لم يرها إلا يوم زواجها ويوم أن ماتت أمه ، ولم يربطه بها سوى خطاباتها القليلة التي كانا يتبادلاهما ، ولم يحاول زيارتها ، فقد قطعت رشا الصلة بينه وبين أي شخص

يمت له بصلة، حتى تضمن خضوعه التام لها، وعلى هذا لو جازف وذهب إلى أخته فسوف يخرج من فلك رشا، ولا يدري إلى أين يذهب، فمن غير المعقول أن يقيم مع أخته المتزوجة، وهي أيضاً في القاهرة، وهو في الإسكندرية حتى لو اتخذ سكناً خاصاً به وحده لن تتركه رشا في حاله، وتنقلب عليه في شراسة هو يعلم كم هي شرسة عندما تغضب كما أنه كان لا يريد فراقها .

كان القيد مطبقاً حول عنقه في إحكام، بحيث لا يستطيع حله مهما حاول، المهم أن يكون معها دون أي اعتبار آخر .



بدأ يرى فشل أولاده في الدراسة، ولا يستطيع أن يتكلم، وعندما أبدى لرشا هذه الملاحظة قالت له :  
— هيعملوا إيه أكثر من اللي بيعملوه ؟ دي قدرتهم وهم ونصيبيهم .

لم يتكلم ولم يعلق، بل وضع همه في قلبه، والتزم الصمت منعاً من الدخول معها في أي نقاش يعلم هو أن الغلبة ستكون لها .

كان يعرف أنها لا ترعاهم تعليمياً ، ولا تهتم بدراساتهم أو بمذاكرتهم ، وهو ليس في مقدوره أن يساعدهم في حياتهم التعليمية فإن الأمر أمرها .

أما بالنسبة لابنته حنين فقد شبت عن الطوق ، وبدا أنها تتخذ طريق أمها في ملابسها وإبداء زينتها والمبالغة فيها مقتدية بأمها في هذا المسلك .

والغريب أن أمها كانت سعيدة لمسلك ابنتها ، فقد كان يسعدها أن ترى ابنتها ، وقد بلغت طور الشباب ، وتبالغ في زينتها وميوعتها .. كانت أمها تنظر إليها على أنها امتداد لجمالها ، وترى فيها أنوثتها التي بدأت تذبل فلم تحاول عنفها عن أي خطأ ترتكبه ، ولم تحاول أن تجعلها تخفف من غلوائها في تبرجها .



مما زاد في مأساة وجدي أن أبناءه لم يكونوا يخشونه ، محتمين في أهم عند أي خطأ يرتكبونه ، فكانت تدافع عنهم في الخطأ والصواب ، مما جعله لا يتدخل في شؤونهم .



فشل الولدان في دراستهما، وكان ذلك طبيعياً لغياب دور الأب ودور الأم، واتجها إلى تناول المخدرات، وكان لزاماً عليهما أن يدبرا ثمن ما يتعاطيانه، فلجآ إلى العمل في بيع المياه الغازية على شواطئ الأسكندرية، وتأجير الكراسي والشماسي للمصطافين، هذا في فصل الصيف، أما في فصل الشتاء فقد كانا يلجان إلى أي عمل يجداه أو يتيسر لهما، ثم جاء دور حنين في الانحراف، فقد تعرفت على شاب منحرف أيضاً بادلته الحب، وتمادت فيه، ولما خافت من أخويها هربت معه إلى حيث لا يعلم أحد .



انفرد وجدي بنفسه، وجعل يفكر .. ابناه ضاع مستقبلهما، وابنته هربت مع من أحبته ولا يعرف عنها شيئاً .. إلى هذا الحد سقطت في هذه الهاوية ؟

وتساءل لماذا حدث ذلك ؟ لا بد أنه جزاء ما اقترفته في حق فكرية، تلك الإنسانية التي كانت على خلق، وفي حق ابنته رجاء التي لم يرها منذ فارقهما ولا يعرف شيئاً عنها . وماذا في وسعه أن يفعله الآن ؟ لا شيء إنه يشعر أنه سجين حكم عليه بالسجن مدى الحياة .



أخيراً اعترفت الأم بخطئها، فقد ضاع مستقبل ولديها، وهما الآن مشردان على شواطئ الأسكندرية، أما مصيبة البنت فهي الطامة الكبرى وخنجر دق في قلبها .

نظرت إلى زوجها نظرة عتاب، ونظر هو إليها نظرة لوم، نظرتها هي عتاب على ضعفه وتخاذله، ولكنها أيقنت أنها السبب، فقد حاول إرضاءها بأية وسيلة، ولم تحاول هي أن تغير من طباعه، بل أجبرته على الخضوع لها، ولم تعد له شخصية مستقلة بل كان ظلاً لها .

أما هو فقد نظر إليها لائماً على ما فعلته به وبأولاده، وكأنه يقول لها هذا ما جنته يداك ... لقد حطمتني، وحطمت أولادك، ولو كان الأمر يقتصر علي فقط لوجدت شيئاً من الراحة، أما أن أضيع أنا والأولاد فهذه هي الطامة الكبرى .



أصيب رشاً بكآبة، وانقطعت عن العمل، فتم فصلها من وظيفتها، وأصبحت لا تبارح المنزل، وأصبح وجدي يعيش في مأساة، أبنائه هجره، وزوجته أصبحت على هذه الحالة من الخبل .. ظلت رشاً مثبتة نظرها على وجدي، وعيناها لا تتحركان، وقد اتسعت حدقتا عينيها بشكل غريب، مما أربع وجدي، وجعله يخفض بصره

عنها، وكلما نظر إليها وجدها هكذا مثبتة عينيها  
عليه، ثم فجأة صرخت :

— إيه يا وجدي ؟ بتبص لي كده ليه ؟

— أبدأً يا رشا .

— أنا عايزة حنين .

— بكرة تبيجي .

— أنت اللي خطفتها .

— حاخطف بنتي يا رشا ؟

— أيوه دي مش بنتك دي بنتي أنا .

— عارف بس هدي نفسك .

زاد صراخها وولولتها .

— فين صلاح ورمزي ؟

— مش عارف

— هاتهم مش أنت اللي خطفتهم ؟

— حاخطف رجالة ؟

— ماليش دعوة هاتهم كلهم .

- حاضر .
- أنت مخبيهم فين ؟
- يا رشا إيه الكلام ده ؟ مالك فيه إيه ؟
- ماليش دعوة حاعمل لك محضر .
- اهدي بالله وإن شاء الله حبيجوا .
- تجيبهم بكره .
- حاضر .
- في اليوم التالي زاد هياجها وأمسكت بخناقها وصاحت فيه :
- فين ولادي ؟ وديتهم فين ؟ مش حسيبك إلا لما تجيبهم .
- اضطر أن يجاريها فقال :
- حاضر اهدي بالله وأنا قلت لهم أمكم عايذاكم قالوا حنيجي لها بكره نشوفها .
- إن ما جوش حبلغ البوليس ..
- إن شاء الله حبيجوا .
- ثم سكتت فجأة وقالت :
- هي حنين مع جوزها ؟ راحوا فين ؟ انا كنت عايضة

احضر فرحها .

ثم جلست تبكي وبعد فترة قصيرة صاحت :

— أنت يا صلاح هات رمزي وتعال.

وهكذا ظلت تهذي منادية على أولادها وأحياناً  
تخاطبهم كأنهم أمامها .

ظل وجدي يبحث عن ولديه على شواطئ الإسكندرية  
حتى عثر عليهما، وأخبرهما أن أمهما مريضة وتريد أن  
تراهما . سأل صلاح :

— هي عندها إيه ؟

— عندها حالة هيجان .

— يعني إيه ؟

— عمالة تخرف بكلام مش معقول .

قال رمزي :

— أمي مخها يوزن بلد .

قال صلاح :

— حنخلص شغلنا ونيجي لها .

عندما عاد وجدي إلى المنزل وجدها هائجة، وازداد

صراخها وعويلها، أيقن أنها أصيبت بلوثة في عقلها، واضطر أمام هياجها أن يدخلها في مستشفى للأمراض العقلية نظراً لخطورة حالتها .

في المساء حضر صلاح ورمزي فلم يجداها، وأخبرهما أبوهما أنه أدخلها المستشفى للأمراض العقلية نظراً لخطورة حالتها .

لم تمكث بالمستشفى أكثر من شهرين ثم ... ماتت .



أصبح وجدي وحيداً لا يعرف له مصيراً بعد أن فقد كل شيء، تذكر زوجته السابقة فكريه .. ما أخبرها؟ إنه يعلم أنها لم تتزوج بعده حتى الآن علم هذا من أخته في أحد خطاباتها مكتفية بتربية ابنتها، ترى ما شكل ابنته الآن؟

المؤكد أنها أصبحت عروساً، وقد تكون تزوجت، وهل تعلمت؟ أم فشلت في الدراسة؟

وساءل نفسه لماذا لم تتزوج فكريه حتى الآن؟ هل تعيش على ذكراه؟ معقول أنها تحبه إلى هذه الدرجة؟

صور له تفكيره الساذج أن فكريّة مازالت باقية على  
حبه رغم كل هذه السنوات وأنها ما زالت تعيش على  
ذكراه بدليل عدم زواجها حتى الآن .

وساءل نفسه .. لماذا لا يذهب إليها ليعرف أخبارها  
وأخبار ابنته ، ويطلب منها أن يعيدا حياتهما معا هي  
وابنتها .

## الفصل السادس

ذات يوم رن باب جرس شقة فكرية، ولم تكن رجاء موجودة، وفتحت الباب فإذا بها تفاجأ بوجودي . أجمتها المفاجأة .. وكان وجدي قد بدا عليه كبير السن، وبؤس الأيام، كما بدا عليه الذل والانكسار، وظل كل منهما ينظر إلى الآخر فترة قصيرة، وأخيراً قالت:

— وجدي؟ اتفضل يا وجدي .

سمحت له بالدخول، فقد كانت تريد أن تعرف سب مجيئه إليها بعد هذه المدة الطويلة

..دخل وجدي، وجلس أمامها صامتاً، منكس الرأس ..أحست ساعتها أنها في القمة، وهو في الحضيض، وأخيراً قال:

— ازيك يا فكرية .

— الحمد لله أنا بخير .

- لسه حلوة زي ما أنت .
- الحمد لله احفظ الله يحفظك .
- أمال فين بنتنا رجاء .
- ما تقولش بنتنا ، قول بنتك رجاء .
- هي فين ؟
- في المستشفى .
- زعر وجددي وقال :
- هي بعد الشر عيانة .
- هي مش عيانة هي دكتورة .
- ياه على الزمن .
- الوقت افكرت إن لك بنت .
- عمري ما نسيت .
- كداب .
- صدقيني يا فكرية .
- مش بقول لك كداب وبجح كمان ، من إمتى افكرتها؟ دا انت ما افكرتش مرة تشوفها، أكثر

- من عشرين سنة وأنت بعيد عنها جاي النهارده  
تسأل عليها يا خويا إيه اللي فكرك بيها ؟
- صدقيني عمري ما نسيتهها .
- مش بقول لك كداب وستين كداب ؟ بدليل ما  
فكرتش فيها تشوفها أو توحشك .
- كنت عايز آجي أشوفها بس كنت خايف منك .
- ليه هو أنا بعبع ؟
- صحيح كنت حاتخلييني أشوفها ؟
- مش معقول كنت حا منعها عنك وإنك تشوفها .
- ده اللي أنا فكرت فيه .
- أنت ما فكرتش تبعت لها جنينه واحد أنا كنت  
حارفض أقبل منك أى حاجة لو كنت حولت...يا  
أخي كنت جرب وشوف رد فعلي .
- أنا كنت مطمئن عليها معاكي .
- كنت فكر أنا ما رفعتش عليك قضية نفقة لي ولها ليه ؟
- ليه ؟
- عشان مش عايزة حاجة منك والحمد لله ربيتها

- أحسن تربية .
- أنا مطمئن عليها معاكي .
- لا يا شيخ هي مش لها حقوق عليك .
- طبعاً .
- أمال ما سألتش عليها ليه ؟
- أنا عارف إنها معاكي في الأمان .
- وهل ده كفاية ؟
- أنت قدها وقدود .
- ما فكرتش مرة واحدة فيها لولا قدر الله عيانة أو  
جعانة أو عريانة أد إيه قلبك حجر ؟ للدرجة دي ؟
- والله كان غصب عني .
- ليه ؟ كنت مسجون ؟
- خلاص ننسى اللي فات .
- اللي فات عمره ما يتنسي .
- معلش أنت قلبك كبير وعارف إن عندك عزة نفس .
- الوقت أنت جاي ليه ؟

- مراتي ماتت .
- الله يرحمها وبعدين فين أولادك ؟
- ولدين وبنت .
- وببشتغلوا إيه ؟
- كلهم ما كملوش تعليمهم، واتفرقوا، وكل واحد منهم شق طريقه لوحده وسابوني .
- والبنت ؟
- قال بزل :
- مش عارف .
- قالت بدهشة :
- يعني إيه مش عارف ؟
- حبت شاب وهربت معاه ومن ساعتها مش عارف هي فين .
- يا ساتر يا رب اللهم لا شماتة .
- دا ذنبك يا فكرية .
- وكانت فين أمهم ؟

- دلعتهم أكثر من اللازم لغاية ما وصلوا للدرجة دي .
- وأنت كنت فين ؟
- معاهم .
- معاهم إزاي وضاعوا بالشكل ده ؟
- أمهم كانت السبب .
- أنت عايش في مأساة .
- ده حقيقي
- أنت اللي جبته لنفسك .
- معاكي حق وعشان كده جيت لك .
- يا سلام ليه إن شاء الله ؟
- عرفت إنك ما تجوزتيش لحد دلوقتي ، فقلت آجي نتلم مرة تانية ، وننسى اللي فات .
- تعرف إن جالي ميت واحد أقل واحد فيهم ضفره برقبتك ورفضت عشان خاطر رجاء اوعى تكون فاكر إنني ما اتجوزتش عشان خاطر ، وأنا قاعدة مستنياك ؟
- لا يا حبيبي دا عشان خاطر رجاء بنتي .
- إحنا ممكن نتلم على بعض عشان خاطر رجاء .

- كده بمنتهى البساطة .
- عشان خاطر رجاء تعيش وسطنا .
- رجاء بقت دكتورة يعني مش محتاجة لك .
- برده نعيش مع بعض .
- مش ممكن .
- ليه يا فكرية .
- عشان مش عايزاها تعرف إن لها أب زيك .
- قال باستجداء:
- أي شروط تطليبيها أنا موافق عليها .
- أنت متأكد إنك في وعيك ومش شارب حاجة .
- أنا عارف إنك ست عظيمة .
- وعشان كده سبتني وجريت ورا واحدة من إياهم علمتك الأدب .
- ده صحيح وأنا باعترف بكده .
- يعني حضرتك جاي ومتأكد وواثق من نفسك إنك بمنتهى البساطة حتلاقيني مستنياك ومتلهفة عليك .

— على الأقل بينا بنت عروسة .

— شوف يا وجدي بنتي مخطوبة لواحد دكتور زميلها والدخلة بعد أسبوع .. ما تجيش النهاردة بعد السنين دي كلها وتهد اللي أنا عملته وضحيت بشبابي وعمري كله عشان خاطرها ومش حاسم لك تهد اللي أنا بنيته ... خليك مرة واحدة في حياتك تبقى إنسان ومفيش داعي تظهر لها بشكلك المقرف ده لأنك ما تستحقش تكون أبوها ولا هي تكون بنتك، ولو واحدة غيري كانت تفت في وشك وقفلت الباب .

فجأة فتح باب الشقة، ودخلت رجاء بصحبة خاطبها الدكتور أمجد، ألقيا عليهما السلام .

قام وجدي واقفاً، ومد يده إلى الدكتور أمجد، وإلى رجاء وسلم عليهما .

قالت فكرية :

— بنتي الدكتور رجاء وخاطبها الدكتور أمجد .

نظر إليها وجدي، واغرورقت عيناه بالدموع، وكان بوده أن يأخذ ابنته في حضنه، وجعل يقارن بينها وبين أولاده الفاشلين .. كيف نجحت فكرية فيما فشل هو فيه وفكر بسرعة أنه يجب ألا يحطم ابنته .. سألت رجاء :

- مين حضرته يا ماما ؟
- ده واحد قرببنا من بعيد وجات له أزمة مالية واديته اللي فيه النصيب .
- ثم نظرت إلى وجدي قائلة :
- يلا بقى اخرج وروح لحالك ما تجيش هنا تاني .
- فقالت رجاء :
- ليه العنف ده يا ماما ؟
- هو يستحق اكثر من كده وهو اللي جابه لنفسه انصرف وجدي، مطأطى الرأس، ذليلاً ومنكسراً، وقد أحس بالذل والمهانة التي لم يتوقعها. حقاً إنه كان ذليلاً مع رشا، ولكنه أحس بذل أكبر مع فكرية وهي التي احترمتة في السابق أيام أن كان زوجها، أما الآن فإنها تحتقره وتضن عليه بأبوة رجاء التي أصبحت عروساً، وستصبح زوجة بعد أسبوع، ولكنه يريد أن يرى حفل زفاف ابنته... أصبح في شوق لأن يرى ابنته في الكوشة مع عريسها، ولهذا تردد في السفر إلى الأسكندرية إلا بعد أن يرى زفاف ابنته .
- وجد وجدي وضعاً مغايراً تماماً لما كان يتوقعه، كان يتوقع أن يسترد بعضاً من كرامته المفقودة مع رشا، ولكنه

وجد احتقارا ومهانة زادت فكرية سموخاً وازداد هو ذلاً .

\*\*\*

في اليوم التالي رن جرس باب شقة فكرية، ولما  
فتحت الباب فوجئت بوجودي نظرت إليه شذراً،  
ووقفت تسد باب الشقة وصاحت فيه :

— انت جيت تاني ليه ؟ مش قلت لك ما تجيش هنا  
تاني ومش عايزة أشوف وشك .

قال وجدي بذل :

— أبوس إيدك وأبوس رجلك لي عنك طلب .

— عايز إيه قول وخلصني .

— اسمحي لي أشوف بنتي رجاء في الكوشة مع  
عريسها، وأوعدك مش حتشوفيني بعد كده

— وحتشوفها إزاي ؟ مش عايزاها تعرفك .

— هي مش عارفاني، ومفيش حد عارفني، أنا حاقعد  
بعيد عنها عشان متشوفنيش .

— وإذا حاولت تقرب منها ؟

— ابقى اعلمي اللي يعجبك .

— عشان أنا بنت أصول حاسم لك بس اوعى هي تشوفك أو تقرب منها وإلا أخلي أخواتي يقطعوك .

— من غير أي شوشرة كفاية علي أشوفها وبعدين امشي وأروح لحالي .

— هل ده وعد منك ولو إنني ما أضمنكش ؟

— صدقيني يا فكرية ... أرجوكي .. اديني عنوان الصالة اللي حيتعمل فيها الفرح .

— صالة الزهور اللي جنبنا .

— متشكر قوي يا فكرية .

وانصرف وجدي وأغلقت هي الباب وراءه وافقت فكرية على أن يرى وجدي ابنته بحيث لا يستطيع الاقتراب منها .. يراها في ليلة عرسها وهو محروم منها ... تعمدت أن تجعله يشعر بالذل وألم الحرمان .

مر الأسبوع، وجاءت ليلة عرس رجاء، كان الحفل في قاعة الزهور للأفراح كما قالت فكرية لوجدي .. دخل وجدي القاعة حيث لا يعرفه أحد، وجلس في ركن بعيد بحيث لا تراه فكرية وابنتها .

كانت عيناه لا تكفان عن الدموع، وفي قلبه لوعة

ولهفة أن يحتضن ابنته ويقبلها مهنئاً بالزواج ولم يشعر في حياته بمثل هذا الألم .. يرى ابنته في ليلة عرسها في قمة سعادتها، ولا يستطيع أن يقترب منها .

بعد أن قام العروسان ليستقلا السيارة متوجهة بهما إلى الفندق .. سار وسط دموعه وهو لا يدري إلى أين يسير .. قادته قدماه إلى كورنيش النيل، ووقف على السور متاملاً أمواجه المتلاطمة، ودموعه تنسال من عينيه وجعل يفكر ... زوجته ماتت مجنونة، وولداه ضاعا على شواطئ الأسكندرية، وابنته انحرفت وضاعت في بحر الخطيئة .. أما فكرية فهي التي ظلت طاهرة وشامخة وأبية، وابنته منها أصبحت طبيبة ملء السمع والبصر، وها هي عروس وزفت إلى زوجها، ولم يبق من كل هذا سواه .. في الضياع ... من بقى له حتى يعيش من أجله، وجعل يردد: جئت ذليلاً وانصرفت أذل .

بعد أن ذهب رجاء مع عريسها ذهبته فكرية إلى منزلها، وصلت ركعتين لله، ورفعت يديها إلى السماء تشكر ربها، وتبكي فرحاً بزواج ابنتها .

في اللحظة التي كانت فكرية على سجادة الصلاة ترفع يديها شاكرة ربها كانت رجاء وأمجد يتعانقان في نشوة .. أما وجدي فكان في قاع النيل .

## صدر للمؤلف

- ١ . رمانة ..... رواية
- ٢ . سيدتى المجنونة...رواية
- ٣ . الأختان ..... رواية
- ٤ . حُب فوق مستوى الحب..... رواية
- ٥ . أعطني قلبك... أعطيك جسدي..... رواية

للتواصل مع المؤلف :

٠١١٥٥٣٦٣١٦١

٠١٢٨٢٢٥٤٩٣٨

